

Friday, July 18, 2025

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



KMMTTP

Union Minister Sarbananda Sonowal chuan India leh Myanmar inkalpawhna tur Kaladan Multi-Modal Transit Transport Project (KMMTTP) chu kum 2027 atangin hman tan ani dawn tih a sawi.

Union Minister hian kar hmasa khan Guwahati khawpuia Press Conference ah he thu hi sawiin hmarchhak bial hmasawn nan sawrkar laipui chuan nasa takin hma a la a ti a, KMMTTP Kawngpui India leh Myanmar inkalpawhna chu kum 2027 ah hman tan ani dawn tih sawiin hei hian hmarchhak bial hrang hrang chu ramchhung hmun dangte nen awlsam zawka inpawhna a siam thei dawn a ti a, Aizawl leh Kolkata inkar pawh km 700 lain a tawi phah dawn tih sawiin hmasawnna lian tak a thlen dawn tih a sawi bawk.

Union Minister chuan Myanmar-a Sittwe lawng chawlhna hmun chu peih fel tawh ani a ti a, a pumpuia KMMTTP Project chu kum 2027 ah an peih fel vek dawn tih sawiin tuipui hmanga inkalpawhna hrang hranga hmasawnna a awm theih nan theihtawp chhuah a ni a ti a, hmarchhak bial chu ramchhunga eizawnna hnar pawimawh tak ani tih sawiin ramdang nena insumdawn tawwna kawng pawimawh tak ani tih a sawi.

(Desk)



SWACHH SURVEKSHAN AWARD

Lunglei khawpui chuan khan ram pum huap khawpui fai lawmman, Swachh Survekshan State Award a dawng.

Ministry of Housing and Urban Affairs (MoHUA) buatsaih India ram puma khawpui fai inelna, Swachh Survekshan Award 2024-2025 chu nimin khan New Delhi-a Vigyan Bhawan-ah sem niin, Lunglei chuan State Award pakhat, Mizoram khawpui zinga faina kawnga hma hun eng ber lawmman, 'Promising Swachh Shehar Award' a dawng a. Lawmman hi Mizoram sawrkara Urban Development & Poverty Alleviation (UD&PA) Minister Pu K. Sapdanga hovin, Lunglei Municipal Council (LMC)-a Vice Chairman Pu K. Lalrinawma leh official te'n Union Minister of Housing & Urban Affairs Pu Manohar Lal kut atangin an dawng a ni.

Lunglei Municipal Council (LMC)-a Vice Chairman Pu K Lalrinawma report lo ngaithla ang.

(LMC Vice Chairman)

Swachh Survekshan Award hi Swachh Bharat Mission-Urban (SBM-U) hnuaia inelna niin, he inelnaah hian India rama khawpui zawng zawngte chu tehfung hrang hrang hmangin an inel a. Tun tum hi Swachh Survekshan Award vawi 9-na niin, khawpui len dan azirin inelna huang hrang hrang siam a ni a. Tun tumah hian award chi hrang 78 sem chhuah a ni a.

Kum 2016-a Swachh Survekshan Award bul tan a nih atangin Lunglei khawpui chuan lawmman 6 a dawng tawh a ni.

(Thanghmingliana Renthlei PTC Lunglei)



CNC

Champhai Nature Conservancy leh Environment, Forest & Climate Change Department tangkawp chuan nimin khan Champhai DIET, Zotlanga ah ramngaw leh nungchang humhalh chungchang zirhona hun an buatsaih.

He hun ah hian CNC hmalakna hrang hrang leh Champhai chu Eco tourism hmun tha tak anih dan sawi niin Nungchate humhalhna Dan (Wildlife Protection Act) mipui hrilhhriat thar chungchang leh nungcha chi hrang hrang humhalh a tul zia te leh nungcha ti hlum thin te laka The Wildlife Protection Act 1972 in a hrem theih dan tarlan niin a tam thei anga inzirtirna pek ni se an ti bawk.

(Lalhlupaia PTC Champhai)



ICT SECY VISITS SIAHA DISTRICT

Mizoram Sawrkara Information & Communication Technology (ICT) leh Cooperation Department Secretary Pu Amit Sharma chuan nimin khan Siaha tlawhin sawrkar mi pawimawhte nen DC Mini Conference Hall, Siaha-ah hmasawnna hrang hrang an sawiho.

Pu Amit Sharma chuan Sawrkar inrelbawlina thuam chak turin Mizoram chhunga Sawrkar Pisa pum chu e-office a siam a nih theih nan theihtawp an chhuah mek a ti a, hei chuan nasa takin hna a tih awlsam phah dawn tih sawiin A department chan ICT leh Cooperation Department aiawha kalkhawmte chu an hmalaknate leh hmachhawpte tarlang turin a sawm a, an harsatna tarlan tak te chu sutkian a nih theih nan theihtawp chhuahpui a tum thu a sawi bawk.

Heng bakah hian Pu Amit Sharma chuan Siaha District in hma sawn zelnate turin theihna tam tak a nei a ti a, khualzin mite hip thei tur phochhuah kawngah department tin te tan la lehzual turin a fuih a, District mawina leh danglam biknate chu hmang tangkai thiam turin a chah bawk a ni.

(DIPR)



LAWNGTLAI SP MEETS MJA

Lawngtlai SP Pu PC Lalchunglura chuan dan leh thupek kenkawhna leh boruak nuam leh ralmuang a awm theih nan Chanchinbumite thawhpui atan a sawm.

Lawngtlai SP hian nimin tlai khan Lawngtlai District MJA Member te zanriah buiatsaih sakín Pu PC Lalchunglura chuan District ralmuang, dan leh thupek kenkawhna ah mipui tan tha taka hna an thawh theih nan Chanchinbumite thawhpui ah sawmin, Chanchinbumite chu kawng hrang hranga mipui sukthlek leh kal dan khalh ngil na ah an tangkai hle tih sawiin, Chanchinbumite chu Police tello pawn an awm theih laiin, Police te chu Chanchinbumite thawhpuina tello chuan an hnathawh a chak theilo tih a sawi.

MJA Lawngtlai District hrúaitute chuan Lawngtlai khawpui leh District inrelbawlina atana Police tha ti chak turin thawktu tam zawk mamawhna a len thute an sawi a, Lawngtlai Traffic Police dinhmun chu ennawna, tihchak a thuam that an ngaihna ah SP chu hmala turin an ngen a ni.

(Lalngheta Ralte PTC Lawngtlai)

